

元史

卷二百七  
之二百十

涵芬樓影印

元史卷二百七

明翰林學士亞中大夫知制誥兼修國史宋濂等修

列傳第九十四

鐵失

鐵失者當英宗卽位之初以翰林學士承旨宣徽院使爲太醫院使未逾月特命領中都威衛指揮使明年改元至治有珍珠燕服之賜三月持授光祿大夫御史大夫仍金虎符忠翊侍衛親軍都指揮使依前太醫院使英宗嘗御鹿頂殿謂鐵失曰徽政雖隸太皇太后朕視之與諸司同凡簿書宜悉令御史檢覈旣而又命領左

右阿速衛冬十月英宗親祀太廟以中書左丞相拜住爲亞獻官鐵失爲終獻官明年冬十月江南行臺御史大夫脫脫以疾請于朝未得旨輒去職鐵失奏罷之杖六十七謫居雲南治書侍御史鎖南鐵木迭兒之子也罷爲翰林侍講學士鐵失奏復其職英宗不允十二月鐵失以御史大夫忠翊親軍都指揮使左右衛阿速親軍都指揮使太醫院使兼領廣惠司事英宗嘗謂臺臣曰朕深居九重臣下奸貪民生疾苦豈能周知故用卿等爲耳目曩者鐵失迭兒貪蠹無厭汝等拱默不言其人雖死宜籍其家以懲後也又明年三月申命大夫鐵

失振舉臺綱詔諭中外旣而御史臺請降旨開言路英宗曰言路何嘗不開但卿等選人未當爾朕知嚮所劾者率因宿怨羅織成獄加之以罪遂玷其人終身不得伸監察御史嘗舉入思吉思可任大事未幾以貪墨伏誅若此者言路選人當乎否乎時鐵木迭兒旣死罪惡日彰英宗委任拜住爲右丞相振立紀綱修舉廢墜以進賢退不肖爲急務鐵失以姦黨不自安潛蓄異圖秋八月癸亥英宗自上都南還駐蹕南坡是夕鐵失與知樞密院事也先鐵木兒大司農失禿兒前中書平章政事赤斤鐵木兒前雲南行省平章政事完者前治書侍

御史鎖南鐵失之弟宣徽使鎖南典瑞院使脫火赤樞密副使阿散僉書樞密院事章台衛士禿滿及諸王按梯不花孛羅月魯鐵木兒曲律不花兀魯思不花等以鐵失所領阿速衛兵爲外應殺右丞相拜住而鐵失直犯禁幄手弑英宗于臥所九月四日晉王卽位鐵失及其黨皆伏誅

孛羅帖木兒答失八都魯之子也從父討賊屢立戰功其語見父傳父旣歿孛羅帖木兒引兵退駐井陘口十八年正月命孛羅帖木兒爲河南行省平章政事仍總領其父元管諸軍三月擊劉福通於衛輝走之進克濮

州四月屯兵真定六月自武安由彭城邀截沙劉等敗之九月命統領諸軍夾攻曹州十月遣叅政匡福統苗軍自西門入李羅帖木兒自北門入四門並進克復曹州擒殺僞官武宰相仇知院獲僞印信金牌等物十九年二月過代州收山東潰將孟本周諸軍三月詔李羅帖木兒移兵至大同置大都督兵農司專督屯種以李羅帖木兒領之當月領兵豐州雲內與關先生戰關軍奔潰時有楊誠者據蔚州六月詔遣平章月魯不花樞密同知八刺火者督兵捕之八月圍其城俄有旨命回兵十一月再命勦捕二十年正月李羅帖木兒追誠至

飛狐縣東關誠棄軍遁降其潰卒回駐大同二月除中書平章政事三月命討上都程思忠兵次興和思忠奔潰七月擊敗田豐僞將王士誠於臺州詔總領一應達達漢人諸軍便宜行事八月命守石嶺關以北察罕帖木兒守石嶺關以南九月李羅帖木兒欲得冀寧遣兵自石嶺關直趨圍其城三日復退屯交城十月詔李羅帖木兒守冀寧遣保保殷興祖高脫因倍道趨之守者不納察罕帖木兒遣鎖住陳秉直以兵來爭李羅帖木兒部將脫列伯戰敗之二十一年正月命平章荅失帖木兒叅政七十往諭解之李羅帖木兒罷兵還鎮九月

命孛羅帖木兒於保定以東河間以南屯田二十二年  
二月爲平章左李遣楊榮祖至大同降三月孛羅帖木  
兒遣裨將也速不花等招兵五萬戍大同陞孛羅帖木  
兒太尉中書平章位居第一張良弼來受節制李思齊  
遣兵攻良弼于武功良弼伏兵大破之二十三年十月  
孛羅帖木兒復南侵擴廓帖木兒所守地遂據真定初  
朝廷旣黜御史大夫老的沙安置東勝州帝別遣宦官  
密諭孛羅帖木兒令留軍中而皇太子累遣官索之孛  
羅帖木兒匿不發二十四年正月孛羅帖木兒陰使人  
殺其叔父左丞亦只兒不花佯爲不知往弔不哭朝廷

知其跋扈又以匿老的沙事三月辛卯詔罷孛羅帖木兒兵權四川安置孛羅帖木兒殺使者拒命遣部將會禿堅帖木兒提兵犯闕揚言索右丞相搠思監資正院使朴不花二人先是朝廷立衛屯田嘗命中書右丞也先不花提督與禿堅帖木兒分院之地相近因擾及其親里構成嫌隙也先不花乃譖禿堅帖木兒詆毀朝政孛羅帖木兒與禿堅帖木兒相友善且知其誣遣人白其非罪皇太子以孛羅帖木兒握兵跋扈今乃與禿堅帖木兒交通又匿不軌之臣遂與丞相搠思監議請詔削其官分其兵授四川省丞相察罕不花領之孛羅帖

木兒謂非帝意故不聽命舉兵助禿堅帖木兒四月壬寅入居庸乙巳至清河列營將犯闕帝遣達達國師蠻子院使往問故乃命屏搠思監于嶺北竄朴不花于甘肅實執送與之庚戌禿堅帖木兒自健德門入見帝延春閣慟哭請罪帝賜宴慰勉詔赦其罪仍以李羅帖木兒爲太保中書平章兼知樞密院事守禦大同以禿堅帖木兒爲中書平章政事辛亥李羅帖木兒還大同皇太子恚怒不已再徵擴廓帖木兒兵保障京師五月詔擴廓帖木兒總兵調諸道軍分討大同擴廓帖木兒自其父察罕帖木兒在時與李羅帖木兒連年相讐殺朝

廷累命官講和二軍已還兵各守其地至是擴廓帖木兒乃大發兵諸道夾攻大同調麾下鎖住守護京師兵不滿萬以其部下青軍楊同僉守居庸擴廓帖木兒自將至太原調督諸軍七月李羅帖木兒率兵與禿堅帖木兒老的沙等復犯闕京師震駭丙戌皇太子親統兵迎於清河丞相也速詹事不蘭奚軍於昌平也速軍士無鬪志青軍楊同僉被殺於居庸不蘭奚戰敗走皇太子亦馳入城丁亥夜鎖住脅東宮官僚從太子出奔太子原戊子李羅帖木兒兵至駐健德門外欲追襲皇太子老的沙力止之三人入見帝宣文閣泣拜訴冤帝亦爲

之泣乃賜宴庚寅就命孛羅帖木兒太保中書左丞相  
老的沙中書平章政事禿堅帖木兒御史大夫部屬將  
士布列臺省總攬國柄八月壬寅詔加孛羅帖木兒開  
府儀同三司上柱國錄軍國重事太保中書右丞相節  
制天下數月間誅狎臣禿魯帖木兒波迪哇兒禡等罷  
三宮不急造作沙汰宦官減省錢糧禁西番僧人佛事  
數遣使請皇太子還朝使至太原拘留不報二十五年  
皇太子在外日夜謀除內難承制調遣嶺北甘肅遼陽  
陝西及擴廓帖木兒等軍進討孛羅帖木兒孛羅帖木  
兒怒出皇后于外幽置百日遣禿堅帖木兒率軍討上

都附皇太子者調也速南禦擴廓帖木兒軍也速次良  
鄉不進而歸永平遣人西連太原東連遼陽軍聲大振  
孛羅帖木兒患之遣驍將姚伯顏不花統兵出禦至通  
州河溢營虹橋以待也速出其不意襲而破之擒姚伯  
顏殺之孛羅帖木兒大恐自將出通州三日大雨而還  
孛羅帖木兒先嘗以自疑殺其將保安旣又失姚伯顏  
鬱鬱不樂乃日與老的沙飲宴荒淫無度酗酒殺人喜  
怒不測人皆畏忌威順王子和尚受帝密旨與徐士本  
謀結勇士上都馬金那海伯達兒帖古思不花火兒忽  
達洪寶寶等陰圖刺之七月乙酉值禿堅帖木兒遣人

來告上都之捷孛羅帖木兒起入奏行至延春閣李樹  
下伯達兒自衆中奮出斫孛羅帖木兒中其腦上都馬  
及金那海等競前斫死老的沙傷額趨出得馬走其家  
擁孛羅帖木兒母妻及其子天寶奴北遁有旨令民間  
盡殺其部黨明日遣使函孛羅帖木兒首級往太原詔  
皇太子還朝諸道兵聞詔罷歸九月皇太子朝京師十  
二月獲禿堅帖木兒老的沙皆伏誅

元史卷二百七

元史卷二百八

明翰林學士亞中大夫知制誥兼修國史宋濂等修

外夷傳第九十五

高麗

高麗本箕子所封之地扶餘別種嘗居之其地東至新羅南至百濟皆跨大海西北渡遼水接營州而靺鞨在其北其國都曰平壤城卽漢樂浪郡水有出靺鞨之白山者號鴨綠江而平壤在其東南因恃以爲險後闢地益廣并古新羅百濟高句麗三國而爲一其主姓高氏自初立國至唐乾封初而國亾垂拱以來子孫復封其

地後稍能自立至五代時代主其國遷都松岳者姓王  
氏名建自建至燾凡二十七王歷四百餘年未始易姓  
入元太祖十一年契丹人金山元帥六哥等領衆九萬  
餘竄入其國十二年九月攻拔江東城據之十三年帝  
遣哈只吉劄刺等領兵征之國人洪大宣詣軍中降與  
哈只吉等同攻圍之高麗王名關<sub>闕</sub>奉牛酒出迎王師且  
遣其樞密院使吏部尚書上將軍翰林學士承旨趙沖  
共討滅六哥劄刺與沖約爲兄弟沖請歲輸貢賦劄刺  
曰爾國道遠難於往來每歲可遣使十人入貢十二月  
劄刺移文取兵糧送米一千斛十四年正月遣其權知